

職方典第七百六十七卷

揚州府部藝文三

詩詞

送何明府之秦郵

明高啟

馬前風葉助離聲
楚驛都荒不計程
一令尙淹三縣事
幾家曾見十年兵
夕陽遠樹烟生戍
秋雨殘荷水繞城
父老不須重歎息
君來應有故鄉情

舟次邵伯有懷徐幼文

楊基

文章小技恥雕蟲
也逐羣才赴洛中
多病不宜秋色裏
相思只在暮江東
雞豚籬落茅茨雨
鳬鴨池塘菡萏風
欲買一樽澆寂寞
傷心不與故人同

過高郵新開湖微雨有詠

前人

殘紅曉落西陂岸
雨脚斜飛鷗鷺亂
扁舟盡日畫中行
荷葉荷花香不斷
船頭老翁一尺鬚
斗量菱角兼賣魚
兒能鼓柁女蕩楫
何用聰明多讀書

邗溝

張羽

古今圖書集成
衰楊夾高防北風暮颼颼道逢長老問答言是邗溝相傳開鑿初民勞天爲溝至今濁河底時見白
髑髏陸通梁宋郊水漕荆吳舟渠成萬世利慮始難爲謀至今南北交此土爲名州飛閣跨通波張
幄如雲浮憶昨少年日寶馬珊瑚鉤經過劇辛輩結託金張儔醉酒瓊花觀徵歌明月樓羅綺朝還
暮笙竽春復秋繁華逐逝水一往不可留向來歌舞地茫然狐兔丘家老無兒孫杖篋驅羊牛少小
心尙爾不知今白頭欲從亂離說恐予增離憂長揖分袂去零淚如絲流

高郵城

前人

茫茫高郵城下有古戰場當時魚鹽子弄兵此跳踉燕師掃境出供餽走四方長圍匝百里旌甲耀
八荒譬如高山頽一卵安足當驕將存姑息頓刃待若降兩機不容髮百萬莫與亢鹿走命在庖居
然屬眞王空餘菩薩臺落日風吹黃

揚州道中

前人

馬頭津口足風波歲晏遙乘一傳過南渡客來多漢語下江船去半吳歌蕪城縱入新編戶瓜步斜
連古運河何處吹簫明月夜野田茅屋晚烟多

鑾江別劉希敬

汪廣洋

與君同理揚州棹臥看長天入翠微何事杜陵傷遠別不如范蠡賦東歸春風小殿梨花發宿雨疎林燕子飛惆悵臨岐一杯酒鑾江江上日暉暉

廣陵懷舊

前人

官柳陰陰鎖汴橋暖催晴綠上蘭橈花迎后土依然在人去東風不可招紫陌漸稀春試馬青樓殊絕夜吹簫回看烽火連雲氣應使江淹歎寂寥

分題燕城煙雨送吳原哲教諭

張以寧

燕城路年去年來自煙雨冉冉春濃濕燕絲濛濛曉暗迷鶯樹鮑昭愁絕未歸來爲畫當時斷腸賦登高悵望正思君帆影微茫又東去

通州

陳基

渡江潮始平入港濤已落泊舟狼山下遠望通州郭前行二舍餘四野何漠漠近郭三五家慘澹帶藜霍到州日亭午餘暑秋更虐市井復喧囂民風雜南朔地雖江海裔俗有魚鹽樂如何墟里間生

古今圖書集成
事復蕭索原隰廢不治城邑靳可託良由兵興久羽檄日交錯水陸飛芻粟舟車互聯絡生者負戈
矛死者棄溝壑雖有老弱存不足躬錢鏹我軍實王師耕戰宜竝作惟仁能養民惟善能去惡上官
非不明下吏或罔覺每觀理亂原媿乏匡濟略撫事一興慨悲風動寥廓

如皋縣

前人

曉行過如皋草露淒已白井邑無人烟原野有秋色緇褐兩三人牢落徒四壁似訝官軍至拱立衢
路側伊昔淮海陬土俗勤稼穡瀉漙盡桑麻閭閻皆貨殖及茲值兵燹道路紛荆棘十室九逃亡一
顧三嘆息王師重拯亂主將加隱惻戒吏剪蒿萊分曹理鹽菜谷谷恤瘡痍遲遲歷阡陌上天合助
順九土期載闢白首忝戎行臨風增感激

秦州

前人

吳陵古名邦利盡揚州域舊城雖丘墟新城如鐵石昔爲魚鹽聚今爲用武國地經百戰餘士恥一
夫敵征人還舊鄉下馬問親戚踟躕慨蒿藜徘徊忍阡陌桓桓霍將軍出入光百辟位重言益卑功
高志彌抑誓欲報仇讎不肯懷第宅人羨過家榮驚喜太息白日照旌旗閭里有顏色皓首太元

經雖勤竟何益

登狼山 三首

前人

天風吹上狼山頂看見扶桑日出初
淮海北來吞兩楚江湖南去控三吳
珠宮貝闕馮夷宅古木蒼藤帝釋居
爲訪祖龍鞭石處捫窠屐跡定何如
鯨波渺渺四無涯閭闔天低手可排
一塔倚空凌浩劫兩潮爭港撼層崖
半晴半雨龍歸海衝暖衝寒鴈渡淮
安得乞身依佛日遍尋靈跡訪齊諧
五峯相顧若枝撐力障狂瀾與海爭
下界人居龍伯國上方僧住梵王城
佛庖香訝山無藏公膳腥嫌市有蠅
王事忽忽騎馬去落花啼鳥總關情

狼山觀兵

前人

官軍野次狼山口鐵騎犀船盡虎貔
杼軸萬家供餽餉旌旗千里互江湖
膝行擬伏諸侯將面縛行申兩觀誅
淮海父兄爭鼓舞將軍恐是漢金吾

過揚州

李質

三十年前記此過皆春樓下駐行窩
十千一斗金盤露二八雙鬟玉樹歌
自昔瓊花祠后土至今荆

棘臥銅駝江都門外王孫草怨入東風綠更多

送朱叔英還維揚

錢宰

策策西風太葉稀故鄉何處鴈南飛
岷峨萬里秋江落淮海維揚獨客歸
鐵甕待潮催曉渡金盤壓酒浣征衣
高樓明月如相憶一髮秦稽鎖翠微

泊瓜洲渡

吳浩

淮烟漠漠夕陽收楚樹昏昏翳客舟
風度鐘聲來北固帆將燈影過揚州
雲消碧海天無際波撼金山地欲浮
獨恨壯遊非昔日滿江風露夜如秋

廣陵雜興 三首

袁華

十年不到廣陵城依舊瓊芳弄晚晴
繡被土甌于闐寺寶裝刀劍鎮南營
樓飄簫鼓雲中響地接烟花日外明
小杜風流今寂寞誰攜紅袖按新聲
長江天險隔南徐千古英雄恨有餘
玉樹歌殘龍虎地錦帆船下斗牛墟
柳迷竹浦寒鴉聚水漫雷塘野老漁
欲弔文章賢太守山堂零落昔年書
參差吹作鳳凰鳴廿四橋頭璧月明
不把瓊花祠后土還持彩筆賦蕪城
小樓窈窕低金縷別館蕭

荀下玉巵醉寫烏絲遺所愛風流彷彿記三生

過揚州

王惟允

華屋珠簾十萬家春風吹盡舊繁華
流連野色惟殘蝶應答江聲有亂蛙
明月樓前沽美酒蕃釐觀裏看瓊花
我來漫憶曾遊處立盡斜陽一歎嗟

高郵夜泊

程本立

城樓月色見觚稜城下官河夜欲冰
返照疎林皆野燒殘星別浦是船燈
腐儒食祿曾無補倦客思家已不勝
春雨五湖煙水闊荷蓑歸去下魚簪

雷塘

蘇大年

雷塘春雨綠波濃古塚寒煙蔓草空
斜日欲沉山色近行人無處問隋宮

泊瓜洲懷舊寄顧利賓王又新隱君

劉炳

潮聲月色滿江船回首春風十六年
憶得石橋楊柳巷珠簾銀燭聽歌眠

儀真道中

王洪

古今圖書集成
王程不可緩孤棹且宵征古渡無人語長空惟月明湖連四野闊天與大江平明發維揚郡登臨一
感情

過寶應湖

前人

草屋自成聚門前湖水流平蕪遙見塔小港曲通舟櫓日留飛燕帆風起白鷗江湖多逸興況是及
春遊

維揚懷古

周述

廣陵河上路煬帝昔曾過不見瓊花發猶傳玉樹歌臺荒衰柳在宮廢亂螢多欲問前朝事悲風起
夕波

晚過揚州

劉溥

長河懸落照短棹尙孤征衰柳愁邊斷殘霞雨外明人喧揚子渡鐘動廣陵城漸去鄉關遠淒然倍
旅情

揚州門主人

高叔嗣

空林一葉落茅屋幾家秋對酒涼風至開簾古樹幽相看還自笑欲去爲誰留正是夷門下休猜姓是侯

出揚子橋喜見江南山色

郭第

小艇淮南道經過無限情可憐揚子渡不見海潮生水斷瓜洲驛江連北固城漲沙三十里樹杪亂山橫

維揚懷古

胡儼

維揚自昔盛繁華香靄彤舟映曉霞野店停舟詢往事水亭吹笛是誰家行人尙說金盤露仙子空遺玉樹花二十四橋明月在垂楊幾樹照棲鴉

瓜洲道中

王璣

清江杳杳水連空江北江南綠映紅三月異鄉逢改火經春遊子怨飄蓬滿汀蘆葉孤舟雨一樹梨花小旆風遙望故鄉何處是依稀烟樹五湖東

維揚懷古和胡祭酒韻

曾棨

廣陵城裏昔繁華
煬帝行宮接紫霞
玉樹歌殘猶有曲
錦帆歸去已無家
樓臺處處惟荒草
風雨年年自落花
古往今來多少恨
只將哀怨付啼鴉

揚州

前人

翠裙紅燭坐調笙
一曲嬌歌萬種情
二十四橋春水綠
蘭橈隨處傍花行

舟至高郵風氣尚暖

郭登

北地風高水欲冰
南方秋晚尚餘蒸
漁家香飯聞炊芡
溪女纖歌識採菱
渚櫓搖歸夢客柳
汀舟渡夕陽僧故鄉
多少尊鱸興三十年來愧未能

九日渡揚子江

李東陽

秋風江上聽鳴榔
遠客歸心正渺茫
萬古乾坤此江水
百年風日幾重陽
烟中樹色浮瓜步
城上山形繞建康
直過眞州更東下
夜深燈下宿維揚

聞狼山捷

前人

北風吹捲洞庭波
飛舸還經孟瀆河
今日勝兵方有算
向來遺孽本無多
中宵驛使傳書捷
兩岸歡

聲入棹歌聞說西南猶轉戰幾時甘雨洗天戈

同王元美登揚州蕪城閣得秋字

吳國倫

隋堤高閣俯邗溝載酒歌同賦客遊樹裏鐘聲山寺午簷前雨色海門秋離宮花鳥俱陳迹輦道風沙自古丘二十四橋何處是且乘明月醉揚州

過揚州二首

宗臣

湖上行吟落日邊高秋蕭索倍淒然蕪城舊識參軍賦玉樹空傳帝子篇隋苑雲殘楊柳色邗江夜斷荻蘆烟可憐白舫青蓑者尚有漁歌似昔年青楓滿目生悲涼二十四橋空石梁明月玉簫何處聽寒江秋草爲誰長西雲獨照崑崙紫古道頻吹杜若香世故客愁那有極欲憑尊酒問垂楊

清明揚州道中憶王端公

朱曰藩

江花江草淨春烟北望空懷乘興船水國人家種楊柳清明士女競鞦韆客廚未乞龍蛇火旅食頻催犬馬年遙想風流王桂史西臺銀燭柘枝顛

秋晚登廣陵城

歐大任

西風淮水下邗溝何處關山獨倚樓賦役蕪城荒井逕書來瓜渚斷江流青天寒色千砧夕滄海潮聲萬弩秋滿目蒼蒼見平楚不知歌吹在揚州

揚州感興

金鑾

迢遞古揚州重來異昔遊春風吹酒幔日暮上歌樓夢覺翻疑雨愁多不待秋翩翩征鴈起依舊向沙頭

泊孟城驛東仲輞莊

前人

孟城驛口射陽西水國風烟似五溪萬井落花春後廢幾家垂柳雨中齊時臨野店炊晨黍漸入荒村報午鷄見說輞川多勝事經過原許一相攜

廣陵留別吳虹山

前人

北風江上雪晴時遠道逢君醉不辭臨別更留三夜話相知已是十年期斷雲落鴈聲猶切斜月疎窗影漸移久客不須傷歲暮五湖歸思滿天涯

狼山

盧純忠

海氣晝冥冥禪關萬木青輕雲飛上界空翠落虛庭山閣留人坐江風吹客醒東南形勝地兵甲幾時寧

過高郵作

沈明臣

淮海路茫茫扁舟出大荒孤城三面水寒日五湖霜波漫官隄白烟浮野戍黃片帆何處客千里傍他鄉

登狼山

前人

羣驅寶馬出江關緩控銀鞍獨看山萬里晴光春草遍一天海色暮潮還雲來莽蕩扶桑外地坼東南楚粵間頭白懷鄉空自淚問誰同此駐紅顏

瓜洲江上

程敏政

畫舫長牽日夜行好風天借一帆輕濤聲北擁迎鑾鎮山勢東蟠建業城澤國魚龍爭起舞水村鷄犬誤相驚清罇紅燭論心地記取江南第一城

送李司封謫廣陵

李攀龍

明光起草羨青春服藥求仙笑此身白首雲霄空薦士黃金湖海未逢人
廣陵鴻鴈來秋色寒雨江楓度逐臣見說故園湘水上懶將詞賦弔靈均

遊狼山

朱應登

千古狼山雄此邦登臨真遣夙心降楚天風雨東連海吳地烟花北過江
巖際驚濤喧客枕竹邊飛潤洒僧窗因叅法界金光滿更禮祇園寶樹雙

登狼山二首

劉澄甫

白屋青山間夕陽江山如此忽思鄉遙疑秦嶽孤雲下却顧滄溟北斗傍
落絮殘花春寂寂疎鐘橫笛夜茫茫登臨何用談兵甲郡國蕭條亦感傷
白狼山下血模糊萬里風煙息戰圖寺主復來修草屋居民原自畏兵符
三年浪迹江山在四月風寒草木枯酌酒壯懷歌激烈凭高臨遠自踟蹰

前題

李盦

寶剎珠宮縹緲間雨餘乘興共躋攀天連西北浮雲合地盡東南瘴海環
紫石有巖惟碧蘚白狼無迹自青山勞勞塵鞅知何補徙倚峯頭一破顏

前題

王琬

遠客悠悠無住心偶來此地一登臨
山連北固迴江漢潮落東溟送古今
烈火天遺孤塔迴斷雲日轉半山陰
兵戈莫問當年事碧草黃沙骨未沉

遊東土山

陳堯

飄飄巾舄過東山古刹縈迴竹樹間
瞻有虛樓堪宴賞更無懸磴費躋攀
花時雨歇鷓鴣啼切茶甌烟消鶴夢閒
自笑半生迷苦海擬開吟社傍禪關

秋日登狼山

吳時來

江漢西來萬里秋東溟蜃氣坐全收
波搖絕域諸天接日映洪濤衆嶼浮
地盡東南須保障江吞吳楚此咽喉
望中細數遙山淨擊楫中流歎昔遊

重九登狼山

俞南嶽

九日同登江上臺曇花貝樹淨氛埃
青霄故削芙蓉障黃菊頻浮竹葉杯
滄海風微鯨已遁楚天霜落鴈初來
答嘲不數龍山客作賦眞憐鄴下才

春暮遊狼山

盧楓

春盡山中少客來，風帆沙鳥淨纖埃。
晴雲帶雨飛丹閣，短屐尋詩破綠苔。
梧竹分陰涼石榻，魚龍吹浪濺殘杯。
地逢勝處須拚醉，十里垂楊信馬回。

登狼山二首

林雲程

巉巖石室瞰長江，絕險天開控此邦。
授鉞將軍今重鎮，投戈劇賊舊降塹。
橫遠嶼青龍出帆入，高天白鳥雙山水。
幽佳宜謫更登臨，時擁碧油幢。
屹立青山跨上遊，樓船隊隊列貔貅。
沙田遍遠千村迴，雲塔高懸萬里秋。
瀑散雨聲喧絕壁，虹乘蜃氣接飛樓。
江光一望平如掌，影帶荆吳鞏玉甌。

同王總鎮陳顧兩司登狼山頂

屠隆

一帶樓船控百蠻，高秋明月照刀鐔。
微茫絕島鯨鯢窟，陡削懸崖虎豹關。
上將鷹揚天北極，大人龍臥海東灣。
銷磨不盡英雄氣，好向安期覓九還。

狼山

顧夢游

茲山特以水生奇，極目迷茫混兩儀。
南際點青無對岸，東連一氣是諸彝。
高峯塔語潛蛟立，絕壑風